

				LOMIGA IULAI & AOKUSO 2026
				
ANOTUSI				
SAUNIGA AMATA O LE FONO TELE 36	1			
LAUGA	2	FONO TELE XXXVI—Iulai 12-24, 2026 Salamo 24:1 - “O le lalolagi ma mea ua tumu ai, o a le Ali'i ia...” <i>“O le Foafoaga e Fale i ai le Atua”</i>		
FA'AU'UGA KOLISI FA'AFAlFEAU KFTC	4			
LOTU 'AU TAUMAFAl	4			
LOTU TUPULAGA TALAVOU	4			
SAUNIGA LOTU TALA LELEI	5			
LOTU PENISIONE	8			
O LE MATAUPU SILISILI O LE FAlE O LE ATUA	8			
TUSITUSIGA A LE KOLISI FA'AFAlFEAU KANANA FOU	12			
'AUFAlGAlUEGA AGAVAA MO LE GAlUEGA TAUSI AULOTU	14			

FONO TELE XXXVI—Iulai 12-24, 2026

Salamo 24:1 - “O le lalolagi ma mea ua tumu ai, o a le Ali'i ia...”

“O le Foafoaga e Fale i ai le Atua”

E le fa'aiti'itia le vi'iga ma le fa'afetai i le Atua, ina ua molio'o mai le soifua ma le ola o le Ekalesia Fa'apopotoga Kerisiano Amerika Samoa i lenei fo'i tausaga e tusa ma lana fono usu. A o sauni atu le EFKAS i lana fonotele 36, sa mua'i tatala aloa'ia i se sauniga fa'apitoa i le aso 19 o Iulai 2026. O lenei sauniga na fa'ataunu'uina i le malumalu “Ua Taunu'u” i le laumua i Kanana Fou. Sa molimauina le fa'atumulua o lea sauniga i sui usufono mai matagaluega ta'itasi, fa'atasi ai ma i latou o lo'o fai ma sui o vaega tu ma'oti o lo'o tautuaina le EFKAS.

O le ta'ita'i o le sauniga o le susuga ia **Liona Thompson FT** mai le pulega a LA i Matu. O le faitauina o le Tusi Paia na feagai lea ma le susuga i le fa'afeagaiga ia **Gafoa Pulu** mai le ekalesia i Oxnard. Ina ua mae'a le faitauina o le Tusi Paia, sa maua le avanoa o le failautusi aoao o le EFKAS, le susuga i le failautusi ia **Nafatali Faleali'i FS** e tolaulauina ai suafa o i latou ua fai i lagi le folauga, ua le mafai ona aulia mai le fonotele o lenei tausaga 2026.

O talosaga na saunia e le susuga i le fa'afeagaiga ia **Luaao Leasiolagi** mai le ekalesia i Carson. O le fa'asoa fa'aleagaga e pei ona tapena i ai le ta'ita'i o le sauniga, sa taula'i i manatu nei, *“O le foafoaga o le malumalu o le Atua. O le Atua o le tufuga poto. O le mata'isau o le Atua, sa Ia faia ai le lalolagi mai le nunumi ma le gaogao. O le malumalu o lana tagata, ma o le*

autu o le tagata, na te tausia le malumalu o le Atua.” O mafaufauga e feso'ota'i lelei ma le manulauti o le fonotele 36 “O le foafoaga e fale i ai le Atua.” O manatu ma lagona e tapena faaleagaga ai le ekalesia aoao ma le mamalu o le au usufono, a o lumana'i le faagasologa o lana fonotele. O le sauniga o le faamanatuga na ta'ita'ia lava e le susuga ia **Liona Thompson FT**. O vi'iga o le sauniga na saunia lea e le matagaluega mai Kalefonia i Saute.

O le agaga fa'age'etia i le to'atele, o le maua o lenei avanoa matagofie e feiloa'i ma ofo'ofota'i ai. E le gata i sui usufono a e fa'apea fo'i le to'atele o tupulaga talavou sa mafai ona auai mai i le fonotele o lenei tausaga 2026. O le faamoemoe sa tapena mamao i ai le ekalesia aoao, a'o lenei ua fa'ataunu'uina i le manuia.

O le fono usu a le EFKAS e ta'i lua tausaga ma fa'ataunu'u. O le taimi e faasoa ai manatu ma lagona, e so'alaupule ai mata'upu auā le lumana'i manuia o le EFKAS ma ona tagata. Talosia ia i le alofa o le Atua galuega faagasolo a le EFKAS mo le isi lua tausaga lea ua amatalia. Faamanuia le Atua i le tula'i mai o le laulau fono filifilia, ia maua pea le tofā faa-le-Atua e ta'ita'iina ai le ekalesia ma ana fuafuaga fai, se ia aulia le fonotele o le 2028.

Saunia Sau Ifopo AKF

O LE LAUGA

T. Paia: Kenese 18: 1-10.

Matua: Kenese 18: 3, 4, *“Ua faapea atu foi o ia, Le Alii e, afai ua alofaina mai nei a’u e oe, aua ne’i e maliu loa mai ia te a’u lau auauna; se’i aumaia sina vai, e mulumulu ai o outou vae, ma outou malolo i lalo o le la’au”*

Mataupu: “Ia faaoga avanoa uma mai le Atua.”

Avanoa i le faaogaaga o taimi o le ola mai le Atua:

Na faamalamalama e le isi faiaoga i lana vasega le fesoota’iga o le taimi ma le ola faaoga. Na fai ane ai le faia’oga, afai e tape ma faapa’u ifo e le tagata le uati mai se fale mauuluga, ma nanati ane i lalo. E oo ifo le tagata ua nuti le uati aua e le taofia le taimi se’i oo ifo le tagata i lalo.

E faapena taimi o le ola ma lona atoatoa i le faatulaga ai e le Atua, e le mafai ona taofia se’i malilie o tatou loto. E pei o le upu e fai i le taimi ma le tai, “e le mafai ona taofia i le tagata.” Pau le ituaso e gata ai taimi o tatou ola, ina ua oo ifo i le tuugamau. E gata ai le taimi nei (present time) mai le Atua i le tino, a e faasolo i le agaga e leai ni ona taimi.

O taimi i lona faaogaaga e Aperamo:

O le faitauga na tatou faalogologo iai (Teut. 18: 1-10), o loo faailoa ai le faaogaaga e Aperamo o taimi mai le Atua, ina ua afea lona aiga e le au malaga. E lua vaaiga o avanoa i le faaoga ai e Aperamo o le taimi feiloa’i ma le au malaga: **Muamua**, o le faailoaga o le loto tatala talimalo o Aperamo. Na fai ane ai (v. 3), ...Lo’u Alii e, afai ua alofaina mai a’u e oe, aua ne’i e maliu loa mai ia te a’u lau auauna.

O le augani mai le agaga tali-malo ina ua lagona e Aperamo, le lofia ai o lona ola, i le sootaga ma le Atua e ala i le feagaiga osi i le taimi-tuana’i, ma manuia mo lona aiga i le taimi-lumana’i. Na faailoa ai le tali atu a Aperamo i le agaga faaletapua’iga. “...ona momo’e atu ai lea nai le faitoto’a o lona fale ie e faafetaia’i ia te i latou, ona ifo toele lea o ia” (v. 2e).

O faailoga o le loto tapua’i, aua ua iloa e le na o ni tagata le au malaga, a o agelu. O le tagata va’ai mai le loto lofia e le mana o le Agaga o le Atua. E pei ai vaaiga, o faaaliga o le Atua mafuta ifo. O le vaaiga aua ua uma na osia le feagaiga ma le Atua; ua fai ai vaaiga, e pei o le tali faapa’u tapua’i a Aperamo o le olaina e le tagata le faatuatua i le Atua (Biblical spirituality).

Ua faaaliga ai i le tali ‘tapua’i’ a Aperamo tapenaga o le ola fesoota’i i le Atua i tala o le nuu o Isaraelu. O tala

ua faailoa ai vaaiga o le ola sosoo o tagata tofia e le Atua, e pei o le tali ‘tapua’i’ a Aperamo i le taimi nei. O le tali na tapena mai le taimi o le feagaiga osi a le Atua ma Aperamo, ua faasolo atu i le taimi-tuana’i. Ua tuana’i ai le taimi o le feagaiga osi, ae ua tapena ai le tali atu a Aperamo i le Atua i le taimi nei, i le agaga tapua’i.

Ua tali-malo ai Aperamo mai le agaga, e pei o le tagata tapua’i faitaulaga i le Atua. O le taulaga, e tupu mai le loto ua malie i le faasoa a le Atua, e pei ona autu ai le sosoo-tapua’i-talimalo a Aperamo.

O vaaiga e lua i le faaogaaga e Aperamo o taimi-feiloa’i ma le au malaga e fai ma avanoa, o le faatinoga o le tali-malo. E mai le loto ua malie i le alofa o le Atua. Ua naunau ai e faaoga le taimi feiloa’i ai ma le au malaga, e faatino ai se galuega e faailoa ai lea malie. Na saili ai (v. 4),... “Se’i aumaia sina vai e mulumulu ai vae, ma outou malolo i lalo o le laau...”

O le tama ua faaoga le taimi mai le agaga ua faatumulia i le malie i faaaliga o le alofa o le Atua. Ua faaoga ai le taimi-feiloa’i, e fai ma avanoa e faatino ai sana mea sili e ala i le tautua. Na o sina vai ma sina mea taumafa, aemaise le tala ua talia le au malaga faaaliga ai le Atua i lona aiga ma ona eleele.

O le vaaiga tali-malo i le tala, e pei fo’i o le tali-malo mai agaga i le aganuu Samoa. E le sopo le vaai i soo se tagata aga’i ane i tafa-fale, tusa pe le-aiga, ae valaau e afe ane e malolo, pe fai se ipu vai, poo se mea tausami. Tusa pe le lava taumafa ae valaau se’i ofo sina vaega o le taumafataga o loo iai.

Agaga Talimalo i le aganuu Samoa:

O le talimalo a Aperamo mai le vaaiga faaSamoa, ou te faamatalaina o le talimalo faafaleSamoa. O le tali-malo, e maua ai le fuaitau, “O le fale ma lona anofale” poo le fale fau ma le loloto o le ola tapena i le faaogaaga o fale (*The Samoan house and its hospitable values*). O fale Samoa e leai ni puipui. E ese mai fale papalagi, e tapunipuni, e na’o faitotoa ma faamalama e iloa ma fesoota’i ai ma fafo o fale; e faapea fo’i i le vaeveaga o totonu i potu. Ua pei ai vaaiga o le tali-malo faaSamoa i le tala lelei, i taimi nei, o fale-papalagi tapunipuni. A vaaia tagata aga’i ane i tafa-fale a o tali le sua e tapuni faitoto’a ne’i iloa mai o ‘a’ai.

Vaaiga o le eseele o le faaogaaga o taimi i le tala lelei. Sa tatala i aso ua mavae. A o taimi nei ua tapunipuni; ua fua le talimalo i tagata e maua ai mea. Ua fua i le malie o le loto, a e le o le loto ua malie i le faasoa a le Atua.

O vaaiga faafalepapalagi tapunipuni e pei fo’i ona mailei ai e atunuu malolosi mai fafo lelei tatau mo tagata Pasifika. O faiga o loo autu ai le eliga o le alititai, a e o i ai le ola o figota ma i’a o loo tua iai atunuu o le Pasefika. O faiga ua le maua ai le agaga tatala mo le lelei lautele mo

tagata Pasefika. Ua le faaalua ai fo'i i nei faiga le malu ai o le Atua i le foafoaga, e pei o le mannulauti o le fonotele (36), ina ia fale/malu le Atua i lana foafoaga..

Aganuu mulumulu-vae ma le talimalo faafaleSamoa:

O le faatinoga o le tali-malo faalsaraelu ma atunuu Mesopotamia, e pei ona faaaoga e Apereamo, o le mulumuga o vae. E leai se aganuu mulumulu-vae a Samoa. Peita'i, o le talia ma faataua ai e le tasi le ola o le isi, o le tali lelei mai le agaga tatala, e aua ai le talimalo faafaleSamoa. O le talia e autu ai i le "Va". O le "Va" e sosoo ai i le pa'ia o le Atua faaalua ai, e pei ona faamatala, o le "Va tapuia", "Va lelei", ma le "Va fealoa'i"; e alo atu ma alo mai.

O le talimalo, e faalia ai le faaaogaaga o avanoa mai loto ua malie i le faasoa a le Atua. Pe matitiva ai pe tele se tamaoaga, e faatino se mea lelei fai atu, ae le faatali se'i fai mai se mea lelei. O le vaaiga fo'i lea o le tautua, e fesoota'i lelei ma le ola faakerisiano; pe matitiva ai i le tino, ae mauoa i le agaga. Ua faamatala ai fo'i le faaoaina faaleagaga mai le ola ofo, "o tagata e matitiva fesaga'i." Ua fesoota'i ai iinei, le soifua ofo-tali-malo faaSamoa, ma le soifua ofo faitaulaga faaKerisiano. Pe matitiva i le tino, ae ua mauoa faatasi i le agaga.

Fai mea sili talimalo mai loto ua malie i le faasoa a le Atua:

E manatu nisi ua saisaitia le ola ma le tala lelei i faiga faaleaganuu Samoa. Peita'i, o le faaaogaaga o le aganuu ua pei o falepapalagi tapunipuni, ua tatou faafalepuipui ai o tatou ola, i lagona fia faamalie faapito i le tino. Ua taita'ina sese ai le to'atele i le faigofie ona maua mea i taimi nei i faiga faapapalagi, e pei o fesoota'iga faatekonelosi, ma le maua gofie o tupe, i faiga nono. O vaaiga faigofie ua seetia ai i le ola faamalie faapito.

Ua faaaoga ma pulea fo'i 'taimi nei' i mea alofa maua fua mai le malo tele ('food stamp' ma tupe mai 'welfare'), i le ola faamalie i mea maua gofie. Ua sasao ai foi faigapisinisi faalilolilo faaaoga ai fualau faasaina, ma aafia atu ai le soifua o fanau. Ua aafia ai ma nisi faamoemoe i ai le puipuga o le saogalemu, faapea nisi o faigaluega i le tala lelei a le Alii. O vaaiga o le ola faafalepuipui e lagona faamalie sese faaletagata.

Manuia mai le fai mea sili o le tau ta'ele i le tautua faaola:

O le talimalo a Apereamo mo le aumalaga, na fai ma faaaliga atoa o le ola faaaoga e tusa o le taimi-talimalo. E le o se talimalo na faasilisili ai mea e maua mai. O le

tautua mai le agaga, e pei ona autu ai le aganuu a Samoa. Pe leai se mea 'ai a e valaau e afe. E laga le aiga e tapena se mea mo malo. O le tali-malo e autu i le agaga, a e le o le tino, ma pei ai tagata afea aiga, o agelu a le Atua. O tagata pei o agelu ona o le filifilia ai e le Atua e pei o Apereamo. O le filifilia e autu ai fo'i le ola faaaoga i taimi mai le Atua. Ma faaaoga ai taimi e fai ma avanoa mo le tautua faaola.

O taimi e pei o la le Failauga (3: 1), "o le mea ma lona tausaga i mea uma, ma ona lava po i mea uma lava i lalo o le lagi...." O taimi faasoasoa mai e le Atua ('Kairos time' poo taimi i tausaga ma aso), ina ia fai ma avanoa (apportune/Chronos/season time poo taimi i tau), i le tautua tino mo le Alii.

O le tautua fo'i e pei o upu a Iesu, i le faataoto faataoto i le tupu ma tagata faigaluega, ina ua latou alolofa i tagata vaivai ma mafatia (Mtt 25). Na fetalai ai le Alii (v. 40), "...aia na fai e outou i se aupito itiiti o o'u uso nei, o a'u lava lea ua faia i ai." O taimi mai le Atua, ua fai ma avanoa o le tautua faaola.

O taimi a le Atua saili mai pea, i ona taimi aua o le Atua e ana taimi. Pau la ta vaega o le faaaoga e fai ma avanoa mo tatou ola ofo i le feau faaola, e pei ona atoa le faaaliga, i le soifua na ofo mai o Iesu, i le faaaoga ai o ona taimi i le lalolagi, a o le'i maliu. Peita'i, o lona toetu ina ua maliu, ua fai ma faavae i le faaaogaaga o taimi o tatou ola, e fai ma avanoa o la ta tautua faaola.

Na tali-malo ai Apereamo, ae saili-malo Iesu ina ia fai la ta tali-malo faa-le-aukerisiano faaaoga ai le aganuu Samoa, ma faaaliga o le mafutaga faavavau i le fale ma le maota o le Alii i lona malo. Ia faaaoga ai taimi o tatou ola, tatou te tali-malo ai i le Atua, a o tatou i ai pea i le taimi-ola o le faasoa a le Atua. O le ola faaaoga i le talia ai o isi, e pei o agelu tali-malo ai Apereamo, ma pei ai tatou o agelu auina e le Atua mo le fe'au faaola a le Alii i le lalolagi.

Ia manuia ma ia fai pea le tautua, i taimi o tatou ola mai le Atua, ma avanoa e ta'uaoga ai o tatou ola i le silafaga a le Atua...

Saunia Tony Hollister FT

Fa'au'uga a le Kolisi Faafaifeau i Kanana Fou 2026

O le sauniga o le fa'au'uga a le kolisi fa'afaifeau i Kanana Fou sa fa'ataunu'uina i le aso 11 o Iulai 2026 i le Malumalu "Ua Taunu'u" i le laumua i Kanana Fou. O le sauniga e aloa'ia ai le taumafai a susuga i a'oa'o ma o latou faletua i le mae'a ai o le fa tausaga o le ola a'otauina. O le ta'ita'i o le sauniga o le susuga i le faifeau toeaina ia Liona Thompson mai le EFKAS "Ola Fou Long Beach." O le tatalo na saunia e le susuga i le faifeau toeaina ia Siasage Siamu mai le EFKAS "Epenesa Fou", a'o le faitauina o le Tusi Paia na feagai lea ma le susuga i le fa'afeagaiga ia Reupena Alo mai le EFKAS i Pava'ia'i. Sa maua le avanoa o le peresetene o le kolisi fa'afaifeau ia Rev. Dr. Pasesa Sapolu e fa'alauiloa ai se ripoti a le kolisi fa'afaifeau e ala i porokalama a'oa'oina ma galuega fa'agasolo a le kolisi mo le lumana'i. O le susuga i le faifeau faiaoga ia Craig Masaniai, le fa'atonu o mataupu tau a'oa'oga (Academic Dean) sa fa'alauiloaina le vasega fa'ai'usage, a e sa fa'amaonia e le ta'ita'i komiti a le Au Toeaina ia Liona Thompson. O le taua'aoina o tusi pasi na feagai lea ma le susuga i le faifeau toeaina ia Liona Thompson, le sui ta'ita'i fono a le ekalesia aoao ia Rev. Elder Leatulagi Faalevao, ma le peresetene a le kolisi faafaifeau ia Rev. Dr. Pasesa Sapolu.



O le upu fa'amalosi 'au mo le vasega fa'ai'usage na saunia lea e le susuga i le faifeau toeaina ia Eleasaro Fa'ata'a mai le EFKAS i Petesa Tai. O le autu o mafauauga e faapea, "O outou o le masima ma le malamalama o le Atua i le lalolagi puapuagatia". O lo'o fa'aaogaina e Iesu le masima i le Gagana o le feagaiga. O le feagaiga lava lea na afua ai lo tatou vala'auina. O le gafa e fa'aauau pea auā le Atua ma lona finagalo. Faafetai i le peresetene ma le aiga o faiaoga i le kolisi faafaifeau i Kanana Fou mo le galuega sa latou feagai ai, e ala i le a'otauina o tama fanau a le EFKAS. Ia faamanuia le Atua i le vasega fa'ai'usage o le tausaga 2026, faapea fo'i i latou o le a fa'aauau pea lo latou taumafai.

Saunia Sau Ifopo AKF

Lotu Au-Taumafai

Ina ua mae'a le sauniga na tatala ai le Fonotele 36 a le Ekalesia Fa'apopotoga Kerisiano Amerika Samoa, na soso'o ai ma le sauniga a le Au-Taumafai na ta'ita'iina e le Faifeau Toeaina ia Tony Hollister mai le pulega a Tualauta ma Leasina. Na maua le avanoa o le sosaiete o lo'o fa'amaopo'opoina le Au Taumafai e fa'amalamalama ai le latou ripoti auā le aga'i i luma o le mafutaga a le Au-Taumafai. O le tatalo na saunia lea e le sui mai Amerika matu i Sisifo. O le faitauina o le Tusi Paia na feagai lea ma le sui o le matagaluega a Niu Sila ma Ausetalia. E tusa ai ma le faasino ala a le tusi a le Au-Taumafai, o loo aumai ai le autu "Ia fa'aaoga lelei avanoa uma mai le Atua". O le maga muamua o loo fa'aulutalaina "A maua loa avanoa mai le Atua, fai loa" lea na molimau ai le matagaluega a Hawaii, Alaska, ma Amerika. O le maga lona lua ua fa'aulutalaina "E le iloa lava ala o le Ali'i" sa molimau ai le matagaluega Kalefonia i Matu, Kalefonia i Saute, ma Manu'a. O le maga lona tolu, ua fa'aulutalaina "Aua ne'i masalosalo i folafolaga a le Ali'i" lea na molimau ai le matagaluega Sasa'e, Tutotonu 1, ma le Tutotonu 2. O le fa'aevagalia na tapenaina lea e le tupulaga talavou mai le pulega a Tualauta ma Leasina. O vi'iga o le Atua na lagiina e le matagaluega i Sisifo. O le agaga faafetai i le susuga i le faifeau toeaina ia Tony ma le faletua ia Annemarie Hollister i lo la'ua sao i le galuega a le Atua. Lea o le a se'e i pito vao e tapua'i, a'o fa'aauau galuega faagasolo a le Ekalesia Faapopotoga Kerisiano Amerika Samoa.

Saunia Sau Ifopo AKF

Lotu Tupulaga Talavou Fonotele XXXVI

O le sauniga mo tupulaga talavou a le Ekalesia Faapopotoga Kerisiano Amerika Samoa (EFKAS) na faataunu'uina i le aso 18 o Iulai 2026 i le malumalu "Ua Taunu'u" i le laumua i Kanana Fou. O le ta'ita'i o le sauniga o le susuga i le fa'afeagaina ia Isa'ako Mata'utia mai le EFKAS i Masausi. O le faitauina o le Tusi Paia na feagai lea ma le sui o tupulaga talavou mai Masausi, le tama'ita'i ia Sheila Faamao. O le tatalo na saunia lea e le susuga i le faifeau ia Tui Luani. O le lauga poo le faasoa faaleagaga na saunia lea e le faletua o le faifeau toeaina malolō ia Mine Pase. Na fa'aautu le lauga i le tāua o le auai o tupulaga talavou i mea e fai a le ekalesia. E pei o le au leoleo, le au taumafai ma isi tautua e atia'e le ola faaleagaga o le tama ma le teine talavou. O le faamalosi 'au fo'i le mo tupulaga talavou uma o le EFKAS a'o aga'i atu i le lumana'i. Na faai'uina lenei sauniga i se

faaevagelia na tapena i ai le tupulaga talavou mai le EFKAS i Masausi. Sa faatumulia le malumalu “Ua Taunu’u” i le lolofi ma le sagisagi mai o mafutaga tupulaga a le ekalesia e molimauina lenei faamoemoe tãua a’o faagasolo le fonotele o lenei tausaga 2026. A’o sauni atu le susuga i le faafeagaiga ia Isaako ma le faletua ia Loretta Mata’utia i le la penisione, na ia faaogaina ai se faitauga mai le Tusi a Ioane 13:16 e fai ma upu fa’ai’u o le sauniga e faapea lona faitauina “**E moni, e moni, ou te fai atu ia te outou, e le sili le auauna i lona ali’i; e le sili fo’i lē ua auina i lē e ana le feau**”. O le faamalosi mo tupulaga talavou aemaise le aotelega o le EFKAS auā le tautuaina o le Atua ma lona finagalo.

Saunia Sau Ifopo AKF

Sauniga Lotu o le Tala Lelei, Fono Tele 2026

O le afiafi o le Aso Lulu, Iulai 15, 2026, sa fa’ataunu’uina ai le Sauniga Lotu o le Tala Lelei, Fono Tele 2026. Na ta’ita’ina lea sauniga lotu e le susuga i le faifeau, Rev. Reupena Alo (FS) po’o le susuga i le fa’afeagaiga a le EFKAS Pavaia’i. Ona saunoa lea o Rev. Tini Felisi, Failautusi, Komiti Fa’amisionare. Mo se tala otooto o le galuega fa’amisionare a le tatou ekalesia. Mo le taimi nei e valu galuega fa’amisionare o lo’o i ai nei. E tasi le galuega fa’amisionare o le a osia le latou Feagaiga, ma fa’aulufale mai le latou ekalesia i totonu o le ekalesia aoao, i lalo o le Pulega Amerika i Sasa’e, i le mea o lo’o susu ai le Faife’au Toeaina o Rev. Elder Faleu Fatu (FT). Ua fa’atalosaga mai foi se tasi o Ekalesia mo le Faifeau Missionare o lo’o latou galulue, e fai i la’ua ma o latou faife’au. E lua galuega fa’amisionare ua atoa le ta’i fa tausaga o Faifeau Missionare o lo’o galulue ai. Ma o le a faia i ai se fa’aiuga a le Komiti Fa’amisionare, pe toe fa’aaauina la la auaunaga. A leai, ona avatu lea i ai o ni faife’au missionare fou e galulue ai. O lo’o sailiili pea e le komiti nisi o galuega fou o lo’o fia atina’eina i nofoaga i Amerika o lo’o to’atele ai tagata Samoa o lo’o saili se lotu EFKAS e fia tapuai ai i le Atua. O lo’o maua pea avanoa mo faifeau nofo aiga ma a’oa’o e fia galulue fa’amisionare. E momoli atu ai le fa’afetai tele i le ekalesia aoao mo le taulaga o le tala lelei, o lo’o fa’aaogaina pea mo lea fa’amoemoe.

Ona soso’o ai lea ma le saunoaga fa’apitoa a le susuga i le Faifeau Missionare o Rev. Sitau Ofoia Jr. (FS), Hilo, Hawaii. Na ia fa’apea ane ai, “Ou te matua’i ta le tavai ma sula le to’o ma tula, pei o le fetalaiga i le seuga na ifoifo nai le foavao. Ma ou fa’atulou i le paia maualuga o le Atua fa’amatala mea lilo. Le paia o lenei sauniga mamalu, ma sa le avea, o le a mapu i lago e’e i taputoa o ali’i. Ona

e le popo i sou fa’atauva’a. Ae le itiiti le agaga vivi’i i le Atua o manu i lenei afiafi. Aua o lea ua tu i matagi ‘olo le lafoga a lilomaiaava. Ua tatou fesilafai ai i luma o nu’u a e le o tua o nu’u. Ona o le alofa ma le agalelei o le Atua. A e tau ia na ou faaete fi malie ma seu malu lupe o le foaga ma ou fa’atulou. Tulou i le Atua e ana le Tala Lelei. A o le mila ua affio ai le paia lasilasi o lenei aofia. Aua lenei sauniga mamalu. Va ane le susu mai o le ta’ita’i, ma lona ‘au va’a. Susu mai o le laulau fono o le Fono Tele. Fa’apea le susu o susuga i toeaia. Mamalu lava lea o komiti a tama a le ekalesia, o komiti tumau uma, a o lenei taoafiaga mamalu, o le ‘au usu fono o lenei Fono Tele. A e ua ou solituina, tulou, le paia o lenei sauniga, ona o le finagalo o le Ta’ita’i Fono o le Komiti Fa’amisionare, Rev. Reupena Alo, e fa’ailo se taumafaiga, i le galuega fa’amisionare o lo’o galulue ai i Hilo, Hawaii.

Tala o le galuega. Viia le alofa ma le agalelei tausila a lo tatou Atua tusa ma le ta’ita’iga a lona Agaga i le tauatina’eina o lana galuega. Ua mae’a le 4 tausaga o le galuega. E lagona ai lava le fa’atauva’a a o se le atoa, ona o le maualuga o le alofa ma le agalelei fesoasoani a lo tatou Atua. Ua le mafai lava e upu ona fa’amatalatala mea silisili ua ia faia. Lea ua sologa lelei ai ma filemu mea uma o le galuega. Leai lava se mea o fa’aletonu. Manuia le aulotu. Mai lava i ona uluao se ia o’o i ona i’u ao. Manuia foi nai tina matutua asiasi atu ona o talavai fa’apea sailiga e fa’aopoopo i le fa’afouina o le malosi o le tino. Manuia foi tama ma tina matutua fa’apea fanau. Ma aiga o lo’o atiae ma aumau i lena itu o le lalolagi. O le upu moni, e ui lava ina fefatia’i pea au o le sami i le folauga, tusa ai ma faigata o le galuega, ona o le fili e le moe, ae viia le silisili ese o le Atua, ua to’a lava i le auau o matagi. A o tulaga e le o’o i ai le malosi o le tagata, e fa’afetai pea i le Atua ona o a outou talosaga e fai fai pea e le utuva. O lo’o talosia ai galuega fa’amisionare a le ekalesia. Ua fai lava lea ma auala e maua ai le malosi, manatu ma lagona, e tusa ma le fesoasoani mai o lona Agaga Paia. E maua ai lava le loto maualalo e felagolagoma’i ma tutu fa’atasi e auauna le Atua ma lona finagalo. Fa’afetai i le Atua ona o le tofa mamao, a tama o le ekalesia, ma komiti fa’amisionare. I le fa’amaite a le Agaga Paia ua afua ai lea galuega fa’amisionare i Hilo. Ua fai ma auala e aapa atu ai i fanau talosia a le atunu’u ua motu ma le taula ona o le fa’alaua’iteleina o le malamalama. O nisi foi o tama fanau a le atunu’u i vaega au a le malo tele, fegasoloa’i ona o faiva feagai, ma afea ai le galuega. O nisi fo’i o fanau a le atunu’u, o lo’o feagai ma a’oa’oga i le setete o New York, na faimalaga atu ona o polokalama a le aoga mo le tau mafanafana, ua maua ai le matou mafutaga. O lea e viia ai le Atua paia, ona o lea avanoa fa’amisionare i Hilo, ua maua ai se avanoa e mafuta ai ma fai tapuaiga fa’atasi ai ma e asiasi atu, fa’atasi ai ma aiga o lo’o aumau ma atia’e ai. E le gata i lea, a o le viiga i le Atua, ona o avanoa na ia

tapenaina lelei, na maua ai se mafutaga so'o fa'atasi, i sauniga ma tapuaiga e fai fa'atasi, ma nisi o ekalesia ua matou fa'aaogaina o latou falesaga matou te tapuai ai. E pei o sauniga o Aso Maliu. O ia avanoa ua saunia ma tatala e le Atua, e le gata e maua ai le agaga o le felagolagoma'i, galulue, tutu ma fusialo fa'atasi i le galuega, aua le fa'alauaiteleina o le finagalo o le Atua. O se tala fiafia atu lea ma lou fa'aaloalo tele."

Sa saunia foi e le faifeau nofo aiga o **Rev. Kleefi Muao (FS)**, **EFKAS Pavaiai**, le tatalo. Ona faitauina lea o le Tusi Paia, e le susuga i le A'oa'o Fesoasoani o Vaisa Vaialega (AF) le tusi mai le Feagaiga Fou, Roma 9:1-18. Ona lauga lea o le ta'ita'i o le sauniga, ia Rev. Reupena Alo (FS), mo le feau o le aso. Na ia fa'apea atu ai, "O le lauga i le Suafa mamalu o le Atua le Tama le Alo ma le Agaga Paia, Amene. Ua filifilia e fai ma matua o lenei afiafi le Roma 9:11e, e fa'apea upu o lo'o i ai, "ina ia tumau le finagalo o le Atua i la le filifiliga, e le ona o galuega, a ona o le na valaau mai." Fai mai le manatu autu o le Tusi Faitauaso mo lenei aso, "Filifiliga fai to'atasi a le Atua, (God's sovereign choice)." Ou te talitonu e le fou lea fa'aupuga i la outou fa'afoga ma la'u fa'alogu. Aua o se upu e fai so'o e le aufaigaluega a le Atua. Ua fai foi ma fa'agogo tagiao i le fa'afoga a le ekalesia ma le atunu'u. A e maise lava pe a fetalai fa'aleupolu, se talofa, o le valaau a le Atua e le o se finagalo iina po'o se loto iinei, peita'i o le filifiliga fai to'atasi a le Atua. O se upu o lo'o avatu ai se fa'amalosia. O se upu fa'alototele a o se fa'amafanafanaga i le tagata. E le o se tatou loto ua mafua ai, a'o le filifiliga fai to'atasi a le Atua.

E tau fa'apena se lagona o lo'o tau faufau mai i saunoaga ma timaiga a le Aposetolo o nu'u ese i tagata o le ekalesia i Roma. Aua fai mai le ulutala, o tusitusiga ia a Paulo i le mataupu e 9. O le alofa o le Atua ua filifilia ai ma fa'aolaina ai le tagata. O le alofa o le Atua lea na fa'ai'u ai upu a le Aposetolo i le mataupu e valu, ma na ta'utino ai, e leai se mea e tasi i le foafoaga atoa, e o'o lava i le oti ma le ola, o le malosi fa'alelagolagi. E leai lava se mea e tasi o na mea uma na te fa'ate'aeseina mai i tatou mai le alofa o le Atua o lo'o ia Keriso Iesu lo tatou Ali'i Fa'aola. Peita'i sa i ai lava le fete'ena'iga i talitonuga ma manatu sa feeseesea'i ai totino o le ekalesia kerisiano i Roma. Aua ua manatu lava kerisiano Iutaia latou, o latou na mua i malae. O le Atua foi na filifilia fa'apitoa Isaraelu e fai ma ona nu'u. O Mose foi na aumaia le tulafono mai le Atua e lima ta'ita'ina ai le soifua fa'aleagaga o tagata. Mai lo latou taofi, pau lava lea o le auala. I le fa'aolataga a le Atua o le tausia lelei o ana tulafono ia. E amata le mataupu e 9, i le tusi lea na tatou faitauina, o lo'o i ai le ta'utinoga a le Aposetolo na fai i tagata Roma i le fuaiupu muamua. Fai mai le Aposetolo, "O le upu moni ou te fai atu i luma o Keriso ou te le pepelo, ua molimau mai ia te a'u lo'u loto fuatia ifo i le Agaga Paia, e tele a lo'u

fa'anoanoa, e le aunoa fo'i le puapuaga o lo'u loto." O le fesili, aisea ua fa'anoanoa ai le Aposetolo? A e aisea fo'i ua tupu ai pea le puapuaga i lona loto? Ua fa'anoanoa Paulo i le ekalesia ona o lo latou taulagi so'o o lo latou mua i malae. Ma latou fa'apea ifo o le Atua na filifilia fa'apitoa Isaraelu, a o lea e tausolomua e i latou ona teena le talaiga i le Keriso toetu manumalo. Ua tiga le aposetolo aua e fiafia i latou e taulagi le alofa o le Atua ae mumusu e fa'atino le alofa. E manatu fa'apito ia te ia lava, a ua le mafai ona tatala atu le alofa i le isi tagata. E le iloa ona ola fa'amagalo e pei ona fa'amagalo i tatou e le Atua.

O le manatu autu la o lenei aso, "Filifiliga fai to'atasi a le Atua" o se fa'amanatu leotele mo le ekalesia kerisiano. O tatou ua filifilia fa'apitoa i le finagalo faito'atasi a le Atua. Aisea ua filifili ai tatou? Ua filifili e fai ma ipu ma va'a o le tala lelei. Ia avea o tatou tagata fa'atauva'a ma ana mea faigaluega, ina ia viia ma saga viia ai le Atua i aso uma. Ia tatou o atu fo'i, e fa'asalalau ma fa'asusulu atu lona malamalama i itu uma lava o lo'o i ai le pogisa. O lona vaiaso, o le a ofaga potopoto le ekalesia aoao i lana fono usu. O le a feagai fo'i i tatou ma a tatou filifiliga fai. O filifiliga i tofiga a le ekalesia, o filifiliga i le fa'asoaina o lona tamaoaga. O filifiliga po'o fea o le a aga'i i ai le ekalesia i le lumana'i. O filifiliga i e mautofi, ma e fo'i o le a mapu atu i le galuega. E le o le fa'amoemoe la o le lauga mo lenei aso le tau fa'atulagaina o fuafuaga ia. E leai. E i ai le mea ua sili atu e fa'asino mai e le Agaga o le Atua e ala i tusitusiga ia a le aposetolo o Paulo. O le loto ua fa'amoemoe i le filifiliga fai to'atasi a le Atua. O le loto lava lona. E faia ai filifiliga uma e feagai ma le tagata fa'atuatua.

O le tusi faitau o le aso lenei, e pei lava ona ou fai atu, ua fa'ailoa ai e Paulo le mamafa o lana avega o lo'o ia tauave. O se auala lea a le aposetolo na te fa'amatalaina ai le pule aoao a le Atua i le ekalesia i Roma. Na latou mafaufau o se tiga o lo'o ia tauave. O le latou le amanaiaina o le filifiliga fai to'atasi a le Atua. A o le tele o lona tiga na afua ai ona fa'apea atu le aposetolo, "Aua ou te mafaia ona fia anatema o a'u ia te'a ma Keriso ona o o'u uso, o lo'u aiga i la le tino." O le uiga o le upu anatema o le inosia. Ma ua manatu Paulo e sili lona inosia ae ia laveai'ina ai ona uso ma lona aiga. O tala ia a Paulo e toe manatua ai Mose i luga o le mauga o Sinai ina ua ia talosaga i le Atua ina ia aveeseina lona igoa mai le Tusi a le Atua a e laveai'ina ai Isaraelu mai lo latou ifo i tupua auro. E ese le mataina o lea lagona o le aposetolo. Ua iloa ai le loloto o le malamalama o Paulo i le filifiliga fai to'atasi a le Atua. E ala i lona naunau ina ia ofo atu lona ola mo ona aiga, o e ua le aofia i le filifiliga a le Atua. E le tupu ai se manatu fa'asausili ma se fa'amaualuga i le tagata e malamalama i ai. A e a fua ai le ola fa'afetai ma le fia ofoina atu o le ola ma laveai'ina ai isi tagata.

Aisea ua manatu ai Paulo fa'apea? Aisea ua sili ai lona inosia ma le te'a ese ma Keriso ae auala ai se manuia mo ona uso ma lona aiga? Fai mai ua alofa lava Paulo ia Isaraelu. I le fuaiupu e 4-5, o lo'o lisi ai e Paulo nisi o manuia na agava'a fa'apitoa ai Isaraelu. Faimai o i latou o le tamafai. O le mamalu, o feagaiga, o sauniga, o le tulafono, o tapuaiga, o folafolaga, o tupuga, mai o latou tuua ma le Mesia i la le tino. Peitai ane o nei manuia ua mae'a ona folafola e Paulo ua le toe patino ia te oe Isaraelu. A e ona o Iesu Keriso, o lea ua manuia ai lutaia atoa ma nu'u ese. O i latou na auala i ai le fa'amanuiaga lea ua foliga mai ua tutu i fafo ma le li'o o fa'amanuiaga. Ma o le lavelave lea o le filifiliga fai to'atasi a le Atua. E pei e tomua mala a e uma ane ua avea ma puna o le filemu. O le ala lea ua manatu ai Paulo, "E le i'u vale le Afioga a le Atua." O le Afioga e taunu'u. A e le mulimulita'i i se manatu fa'aletagata. Pei ona finau Paulo ua filifilia Isaako a e le o Isamaeli. Na filifilia fo'i Iakopo ae le o Esau. Na filifilia le taulaga a Apelu a e le o Kaino. O le fesili aisea ua filifili ai fa'apea le Atua? Ua tali e le fuaiupu e 11 lona fesili, lea ua fai ma tatou matua. "Ina ia tumau le finagalo o le Atua i la le filifiliga, e le ona o galuega, a e ona o le na valaau mai." Ioe o le filifiliga fai to'atasi a le Atua. E le o se tau'i ona o se mea ua fai e le tagata mo le Atua. Leai. A e ona o lona alofa tunoa tele. O lana filifiliga fai toatasi e finagalo i ai o ia ia ola le tagata ae le o le oti. O lea foi la e ono tupu ai se fesili i tagata po'o amiotonu ea le Atua ona o lana filifiliga? Fai mai le tu'ualalo a Paulo i le ekalesia a Roma, "Aua ne'i fa'apena outou." E fa'apena foi se tu'ualalo mo i tatou, "Aua nei o tatou fa'amasinoina le filifiliga fai to'atasi a le Atua." Aua na fetalai le Atua ia Mose, "Ou te alofa atu i le ou te alofa i ai, ou te alofa mutimutivale fo'i i le ou te fia alofa mutimutivale i ai." O lenei, e le mai le ua mana'o, e le mai le ua tausinio, a e mai le Atua o le alofa mai.

Le ekalesia e ma le fono usu, i lenei foi tausaga. O se fe'au fa'amanatu lea o le Tala Lelei mo oe ma a'u ma tatou uma. E tele filifiliga o le a feagai ma lenei fono tele. O nisi o filifiliga o le a tatou le fiala ai. O nisi foi o filifiliga o le a osooso ai ma po po le fatafata ma le agaga fa'afetai. Tau a o lenei, ia le fa'amuamua ina ni filifiliga e saili ai ni o tatou lava manuia. A ia faia filifiliga aua le manuia lautele o le ekalesia ma lana misiona tala'i. O le uiga lea o lo tatou ola ia Keriso. O le ola e ola mo le isi tagata. A e le o i tatou lava.

E tolu lava nai tuualalo mulimuli ona uma lea o le lauga. Muamua, ia tatou manatua le manuia ua tatou maua ona o le ekalesia a Keriso. O le ta igoa ma la ta tagavai, o le ta fa'asinomaga, i la le feagaiga ma le Atua, o la ta tapuaiga, o mealofa uma nei e pei ona fa'amanatu mai e Paulo, e ao ona avea ma ala e tautua ai mo le manuia o le lalolagi na faia e le Atua. E le o ni meatotino tatou te puipuia ina ia manuia ai lava na o i tatou lava. O

a ni a tatou filifiliga e fai, ia mulimulita'i le feau e pei ona tusi atu le aposetolo ia Roma, "E le na o i tatou e manuia ai." Ina ia tafe atu le manuia i o tatou nuu o aiga o le atunu'u ma le lalolagi atoa. A e le o le manuia e teufale mo tatou lava.

Lua, ia fua a tatou filifiliga i lenei fono tele. Le fua ua aumai e Paulo. Fai mai Paulo, "E le ona o galuega, a ona o le na valaau mai." E le o le fa'amoemoe o upu ia a Paulo o le fa'aleaogaina o galuega, leai. E ese le taua o galuega aua o le tino vaaia lea o le fa'atuatua ma le alofa o le tagata i le Atua e ana le galuega. O le tu'ualalo, ia fa'amaite i o tatou loto e ala i lau filifiliga tatau le manatu i le o lo'o valaau mai. Aua lava nei faia i ai se fa'afiapoto ma se fa'aituau, ae po'o ai foi e pito sili ona leotele lona leo, ia manatua o le filifiliga a le Atua e afua i lona alofa tunoa, ae le o ni faiga fa'aituau. Ia fa'apea foi ona tatou fai.

Ma le mea mulimuli, e ono i ai ni feeseeseaiga, ma e leai lava se mafutaga po o se ekalesia e tonu ma atoatoa i le silafaga a le Atua. Pau a o lenei, na o lo tatou malamalama i le filifiliga fai to'atasi a le Atua, e tua lava i lona alofa tunoa. O a foi ni filifiliga e fai e ono le talia lelei i lo outou finagalo, ae o gatasi lava ma le alofa tunoa o le Atua. E le tumau pea lo tatou fa'anoanoa. Aua e i'u lava i le manuia ona o le alofa tunoa o Keriso. O le fa'amalosia'u lea mo i tatou le ekalesia fa'apea foi le au uso galulue i galuega fa'amisiona a le ekalesia i so'o se tafa. Ia tatou maua le onosa'i ma le loto tetele. E le gata i le faiga o filifiliga tatau ma le manuia o le ekalesia a o le talia fo'i ma le loto maulalo. O filifiliga ua ma'ea ona fai e nai tama ma tina o ta'atitia mai atu tia. Sa fa'avae lava i le alofa tunoa o le Atua. Pei o Paulo e i ai filifiliga e tiga muamua mo sina taimi pu'upu'u. A e fa'ai'u lava i le manuia ona o le filifiliga faito'atasi a le Atua.

O lana filifiliga lea fai to'atasi na ia auina mai ai lona Alo Pele o Iesu Keriso, e maluu mo le lalolagi. Na fa'anoanoa ai tina i lalo o le satauro, na atuatuvaile ai ona so'o na o lalafi, ona o se filifiliga e atagia ai se malaia ma le to'ilalo. Peita'i e le o le fa'amoemoe lea o le satauro o Keriso. A o le auala lea na fa'apupula ai e le Atua le lalolagi le lautele o lona alofa tunoa ina ua manumalo ai Keriso i le oti ma le tuugamau. E aofa'i uma ai lutaia, tagata o nu'u ese e o'o mai lava ia i tatou i le manuia sili o le ola e fa'avavau ua tapenaina mo i tatou le au fa'atuatua. Ia manuia tele le fono usu a le ekalesia i lenei tausaga ona o Iesu, Amene.

Saunia Ofisa Lamepa

Sauniga Lotu o le Penisione

A o fa'agasolo taulumaga o le fonotele 36 a le Ekalesia Faapotopotoga Kerisiano Amerika Samoa, sa faapitoa lava le aso o le sauniga e aloaia ai le au-faigaluega ua agava'a i le penisione ma ua sauni atu mo le malologa. O lenei sauniga sa faataunu'uina ia Iulai 23, 2026 i le malumalu "Ua Taunu'u" i le laumua i Kanana Fou. O le ta'ita'i o le sauniga o le susuga i le faifeau toeaina ia Kalasa Afuola mai le ekalesia "Malamalama o le Alofa Tunoa" i Hawaii. O le faalauiloaina o le au-faigaluega penisione e ala i lo latou soifua vala'auina sa saunia lea e le failautusi aoao a le EFKAS ia Rev. Nafatali Faleali'i. O le tatalo sa saunia e le susuga i le faifeau toeaina ia Malaki Muaiava mai le EFKAS "Wainuiomata" i Ueligitone. O le susuga i le faifeau toeaina ia Nofoaga Onesemo mai le Ekalesia "Alofisa o le Atua" i Ausetalia sa feagai ma le faitauina o le Tusi Paia.



O le faasoa faaleagaga mai le ta'ita'i o le sauniga na autu lea i le faafetai i le au-faigaluega penisione. Toe to manatu i le timuia ma le laina i le ao ma le po, ae le i avea ma ala e faavaivai ai i le galuega. Faafetai tautua, faafetai faaeaea i le ekalesia ma lana galuega tala'i. Ua outou sauni e se'e i pito vao e tapua'i, a'o folau pea le sa o le ekalesia aoao i galuega fai ma ana fuafuaga faagasolo i le lumana'i. Faafetai i aiga i le lava papale ma le onosa'i, o a outou taulaga ia mo le Ali'i. Le au-faigaluega penisione, o outou o auauna o le feagaiga ola. Ia maua pea lo outou soifua laulelei a o feagai ai ma malologa. Ia maua pea avanoa lelei e faaogaina ai lo outou soifua tautua i le Atua ma lana galuega.

Saunia Sau Ifopo AKF

“Ole Mataupu Silisili ole Fale ole Atua”

Saunia: Upolu Lumā Vaai (PhD)

Fonotele

**Ekalesia Faapotopotoga
Kerisiano Amerika Samoa,
Kanana Fou
Iulai 21, 2026**

Folasaga

E muamua ona ou faatulou! Tulou le Atua, le Afuaga, le Mataisau, le Tufuga Poto na foa mea uma. Tulou le muamalaga ua muamua atu. Tulou le Aufaigaluega ale Atua ma le Ekalesia ole fale na faapogai mai ile Atua. Tulou mamalu faalemalo, faaleaganuu, faaletalalelei. Tulou le Kolisi Faafaifeau i Kanana Fou nei, ole fale ole tutugā afi e faamumu ai afi ole talalelei. Tulou! Tulou lava!

Oute muai faatalofa ile suafa manumalo o lo tatou Alii o Iesu Keriso. Lau afioga ile Taitaifono male laulauafono. Le susuga ile Taitaifono ole Komiti o Toeaina male laulau. Le paia ole aufaigaluega galulue ma o latou faletua. Le mamalu o matua malolo manumalo ua fofola le fala tapuai ma to'a i manu le sopo'aga umi ole galuega. Faapitoa se faatalofa ile Mamalu o usufono e fia ole Ekalesia ua oto mai le fuifui latou te filitagaga mau ole fono. Le paia faalemalo. Faaleaganuu. Faale talalelei, o le a taoto a ose ta'aga o tailoloto. Malo Tau. Malo Toa. A leai se saili malo, e leai foi ni malo e ma'anu a taeao!

E matuā maualuga lenei faaaloalo male faaea ua musuia ai lo'u faatauavaa e tapena se suāvai aua le fono usu ale Ekalesia. Pau lava o lea, o lota fa'atu, nei taligā le Ekalesia, ae aumai na oni ta'amu mapa'u e leai se ina'i. E sa'o ai le tali ale isi taule'ale'a ole matou nuu ina ua fesiligia ele olomatua poo fea ni palusami ole suavai, ae tali le taulealea, e fiu e tatau penu e le susua. Faiatu loa le olomatua, lona uiga ai foi oni penu Tutuila au penu.

E maualuga se faailo, ao se faafetai, ona ole filifilia o lenei autu, e fai ma 'anofale o faasoa o le fono i lenei tausaga. “Ole Foafoga e Fale iai le Atua” (God takes residence in creation). Momoli le faamalo i lau susuga ile Taitaifono male laulauafono mo lenei faatōfala'iga. Malo le filitupetua.

Avea lenei laolao e fai ai a'u ma sui ole pulega ole tatou Iunivesite i Fiti, le Pasifika Communities University, e momoli atu ai alofa molipo ole pulega male aufaigaluega ile tatou Ekalesia, ose tasi o Ekalesia e pulea le Iunivesite. Sa tulai mai ai le susuga ile Toeaina ia Leatulagi i tausaga ua mavae e fai ma taitaifono o le fono faafae ao avea ma PTC. O loo avea nei le Susuga ile Toeaina ia Faaeteete e fai ma sui ole Ekalesia ile Executive Board. Ole tausaga a sau nei, e oo mai ai le faasologa ile tatou Ekalesia nei, e avea ai le Taitaifono ma Chancellor ole tatou Iunivesite mole tausaga e tasi. Ose mitamitaga sili aua taitai ole tatou Ekalesia.

Ua leva lava ona fetuunai faala'au mamafa lenei pepa. Aua e pei e foliga e apo gofie le autū, ae e asa gatā. Ui i lea, sei taumafai

ia pe sūsua penu. Ole autu o lenei pepa, “**Ole Mataupu Silisili ole Fale ole Atua**”. E faavae mai le mataupu silisili ole pepa mai le tusi a **Ioane 1:1-14** male **Ioane 6:1-14**.

E iai le upu ale atunuu, “*e lelei ona talanoa faafale*”. Faatoa lagona lava upu ia pe a iai se tūgā poo ni matega i Fale. E le gata ina talanoa sulī ole Fale, ae le milia faau’u foi upu. Leaga o lea ua talanoaina le malu ole Fale. *Aua a malu fale, e malu foi fafo*. E amata lava la mea uma ile Fale.

Oute fia talanoa muamua ile tete’e a Ioane ile Fofoaga ose *Fale Tu’ufua* ma *Fale Tu’ufau*.

E le ose ‘Fale Tu’ufua’

O le vaai a Ioane, ole Fofoaga e pei ose *Fale Tele* (cosmic house). Ole taimi ole Senituri e 16 na amata ai ona faufau filosofia ole *Tagata ole Palealii ole Fofoaga*, na *faa-fale’esea* ai isi mea ole Fofoaga, ae autu ile Tagata mea uma, e ui e leai se Palealii o ta’ua ile Tusi Paia. Ae ole Senituri e 18, na amata ai ona fotu le tomai faasaenisi, ma amata ai foi ona vaai tagata ile Fofoaga ose *Fale Tuufua*. Ole *Fale Tu’ufua* e leai sona tagata’aga pei ole tagata. O filosofia ia o loo faavae ai lava le tatou fausaga faatamoaiga i aso nei. Ole Fofoaga ole *Fale Tu’ufua*. E le afaina tele pe a ‘eli ma faaoga tele, aua ua na ose atigi fale.

E le tau toe faailoina le afaina ua iai nei le Fofoaga. Ua mamate vaitafe. Ua su’e fuefue faasoloatoa le tai. Ua le toe tuua faavaitau le tau afā, ua faasoloatoa. Ua faasoloatoa ile tausaga le tau mūgālā, poo lea e ta’ua e toeaiaina ole Tu’iefu. O le tau lea e faimai e tutu’i atu le oso tō tiapula, ae toe to’ulu uma le palapala ile pū. Ua tā mutu le vaotele sa faasoina mai le okesene e manava ai le lalolagi.

E manaia le upu o loo faaogaina e le Tusi Paia Samoa e faaliliu ai le upu “Creation”, ole “Fofoa”. E le o faaogaina le upu “fau”. O le upu “fau”, e faatatau i mea mamate e gaosi ai se mea. O le upu “fofoa”, e faatatau ise mea e le uma sona fausaga. Pei ole vaa foi lea o Lata “*e fau ao fau po*”. E foa ma toe foa. Ina ua oso le faamai tele ole Koviti, ole taimi na taofi ai le gaosimea ale tagata, ole taimi lea na toe vaaia ai le faiva ole “foa ma toe foa” ole Fofoaga.

Ina ua faimai Ioane, “*Ua liu tino tagata le Upu, sa mau foi o ia ma i tatou*” (f.14), e iai le mau taua o loo molimoli mai. E le gata ole Atua le tufuga ole Fale (Fofoaga). A o ia foi na mua’i aināina le Fale. Lona uiga, e lei iai se taimi na tuufua ai le Fale ole Fofoaga. Ua leva ona mamalu le Fale. O le upu “mau” (dwelling) o loo faaogaina, e sau mai ile upu Eleni *skēnoō*, o lona uiga ua “*to lona fale*” po ua “*to lona apitaga*.”

Afai na muamua “mau” le Atua ile Fale, e mafai foi la ona ave le faalupega lea ile Atua, ole *Taufalemau*. Ia poo le tagata foi lea e mau ile Fale e tau atu iai tagata. Ole tagata e iloa ma malamalama lelei ile Fale. O Upu ole Fale. O Sā ole Fale. O lelei ole Fale. E pei ole tagata *Tautai*, ole tagata e malamalama lelei i Upu ole Tai. O Sā ole Tai. O Lelei ole Tai. Ole tagata e iloa ala o i’a. O moegā i’a. Ma tuugā i’a.

Afai na muai “mau” le Atua ile Fale, lona uiga o tatou uma o tagata faimai ile Fale. E le ose tatou Fale. E mulimuli ane ile f.12 ile Ioane 1 lava, e talanoa Ioane e avea i tatou ma fanau ale Atua pe a talitonu. E le o toe tagata faimai ile fale, ae ua fai i tatou ma tagata ole Fale (household). Afai la o tatou o tagata ole Fale, lona uiga, e le mafai ona tatou toe ‘alo ese mai lo tatou tofi faatausi fale (*housekeeping*).

E le ose ‘Fale Tu’ufau’

O le isi feau o le tusi o Ioane, ole Fofoaga e le ose *Fale Tuufau* poo le fale ua leai ni ona tua’oi. Ole Fale ole Fofoaga ole Fale na foa i le Upu ale Atua. Afuaga lea na amata ai le tusi a Ioane i le Upu ale Atua. Ole Fofoaga, ole Fale o Upu. E tausi i Upu. E tua iai Upu. Ole aoaoina e Iesu o Upu ole Fale, e faaoga mea o aso faisoo.

I le Ioane 6:1-14, ina ua faiatu Iesu i lona ausoo “e fafaga tagata”, o le tali ale isi ole ausoo, e o faatasi le tali male fesili: “*O loo iinei le tama o ia te ia areto e lima ma nai i’a iti e lua lau; ae auma ea ia mea ia i latou e toatele?*” (f.9). Taatia ia le tali. Ae oute fia asiasi ile fesili.

Ole fesili, o le fesili faale-tamoaiga. I le taimi o Iesu, e le mavaevae le talanoaina o mataupu faatamoaiga ma mataupu o le fofoaga. Ole pogai lea e ala ai le taua, soo se mataupu o le tamoaiga, e tatau lava ona iai se leo ole Ekalesia.

E aumā mea’ai ona e toatele? Ole fesili o faalavelave. E a’u le faasoa? E lava? Is it enough? Ole upu *aumā* lona uiga o le a’ua’u. Ia lava lelei. Ia lava totoe. O le faamoemoe ole fesili, ia aua nei molo’au se mea. O le tatou masani, ole luma ae le lava. O le tūmati’e male ta’uleleia ose faalavelave, ole lava ma tofu.

Peitai, tasi lea faafitauli ile lalolagi ile taimi lenei, lea foi e iloa i Samoa. Ua le toe iloa le mea e gata ai le “lava”. Ua leai se tua’oi ole aumā. Ua tatou fesili pea? “*E aumā ea ia mea?*” E ui lava o lae lava ma tele? O le faafitauli e le ole lē lava. Ole faafitauli, ua ova le lava.

O aso nei, ua ‘apo e faigamalo ma tatou uma le “tamoaiga” lea e ta’ua o le *neoliberal capitalist economy*. O lenei tamoaiga e galulue tagata ma atunuu uma e fafaga manaoga ole maketi. O le faamoemoe ia faatupula’ia pea faasiliga poo le polofiti. Pau si ona pona, o lenei tamoaiga, nate faamalosiā le mea e ta’ua ole “*Logic of Deficiency*” poo le manatu, soo se atunuu “e le lava” pe “e le aumā” mea o iai e fau ai sona tamoaiga. E tatau lava ona faamoemoe i mea nonō mai fafo.

O Samoa uma e lua, e tumu i mea nonō. E nonō le suauu. E nonō tupe. E nonō mea’ai. E nonō totoga o sua. Ua le toe faaogaina le niu, o le vala, male taisi. E nonō le poto. Faimai isi a le ose tikeri mai Amerika ma Europa e le ose tikeri mauuluga. E pei ose mea tu mauulalo mea e maua i lafanua o Samoa. E oo lava i mataupu silisili o lea e fau ai Ekalesia, o mea nonō. Masalo ana leai le sa ale Ekalesia

e na'o le tasi le faaipoipoga ale aufaigaluega, semanu ua iai foi nai mea nonō faapututupu a faifeau.

O le “*Logic of deficiency*”, ole aupega faatamaoiga, e siita'i ai le value ole mea nonō mai fafo, ae faalaititi le value ole mea e maua lava ile tatou siosiomaga. I Samoa lava ia, ua taugata le faaaloalo. Ua avega male faafafa pe a tuumalo se isi ole aiga. Poo le a le tetele o mea a maua, e iai lava le fesili, “*E aumā ea ia mea?*” Ole mau a isi aiga, ose tū toilalo pe a lē ausia le mea na fai e le isi aiga ile latou faalavelave.

Tamaoiga ole 'Lava ma Totoe'

E leai se mea e pito i sili ona afaina ai le Fale ole Fofoaga, e pei ole tamaoiga. E pei ole tamaoiga ole Deep Sea Mining, e mulimuli ane ou oo iai. I le fafagaina ole motu o tagata, o lea aso na faatū ai e Iesu le Tamaoiga ole Malo ole Atua. Ole igoa o lea tamaoiga, ole “*Tamaoiga ole Lava ma Totoe*” poo le “*Economy of Enoughness*”. Na faaoga e Iesu i'a e lua lau ma areto e lima na sau male tamaititi e faamanino ai le ituaiga tamaoiga e le olopalaina ai le Fofoaga.

- Muamua, ole *Tamaoiga ole Lava ma Totoe*, ole tamaoiga e maua lava ile siosiomaga o tagata. O areto ma i'a o mea na maua ile siosiomaga. E le oni mea nonō mai fafo poo ni mea taugatā na faatau. E saili lava i lumāfale ma tuāfale 'ai na tua iai le faamoemoe. E tele ina mamafa a tatou mataupu silisili faaPasefika i le Mataupu Silisili Faalotoifale, poo le mataupu silisili e maua lava ile siosiomaga, poo lea e ta'au ole *Contextual Theology*. I le taimi ao ou a'oa'o, sa valaaulia le isi faifeau malōlō manumalō e faamalalamalama i ana lava upu le mea e ta'ua ole Mataupu Silisili Faalotoifale. Faimai le tala ale tamā malōlō, ole contextual theology ile faifeau tausinu, e tapena uma ana tusi faitau ma apoapoiga ma tuu i lana taga pe a valaau mai se matāfale. A alu atu ole maliu se'i le mea ale maliu. Ae alu ole failele se'i le mea ale failele (tulou).
- Lua, ole *Tamaoiga ole Lava ma Totoe*, ole tamaoiga e tuutuulima. O areto ma i'a o mea na maua i lima. Aemaise o mea mai lima ole fanau. Na tuu mai areto ma i'a mai i lima ole tamaititi, tuu atu i lima o Iesu, tuu lea i lima ole ausoo, ona faato'a tuu atu lea i lima o le motu o tagata. Masalo e uma ane, ua manu lima uma areto ma i'a. Ae ole lelei lea ole taulaga. Ta te lagona lava o mea na gaosi i lima, e manogi. Lona uiga, e leai se tamaoiga e to'a i o tatou lima. E tata lava ona tuutuulima. Ia tafe le tamaoiga. O aso nei ua le toe tafe le tamaoiga ona ua faigofie ona *tafale* ele au maumea le tagata mativa, ae eli o latou fanua ma le sami.
- Tolu, ole *Tamaoiga ole Lava ma Totoe* e amata ile faafetai poo le gratitude. Ina ua taunuu areto ma i'a i

lima o Iesu, na amata ile faafetai. E lua mea taua e fia faama'ite. Muamua, o le aso lea na toe faamautu ai Upu ole Fale. Amata ile faafetai. E le amata ile faitio. E talilumafale mea uma. Na i luma o tagata mea na maua. Faapaia i luma o tagata. Tufa i luma o tagata. O tatou, ole talilumafale, ole tatou accountability lea. E leai se mea e nanā i tua. E leai se 'ai nanā. E le sao se 'ai vale, male gaoi. Lua, ole tino ole tagata ole Fale. E iloa lea, e ta'u le 'afu'afu lea e faafailele ai le pepe ae le'i fanau mai ole “*falefale*”. Ae ta'u totoga ole tagata, ole *tāufale* (tulou). Ole piitaga lea ole tagata ile Fofoaga.

- Fa, o le *Tamaoiga ole Lava ma Totoe*, e leai se mea e tia'i. Na uma ona aai, ona fu'e lea o toe'aiga, ua tumu ai 'ato e sefulumalelua. E le tia'ia ni mea'ai aua o mea mai le Fofoaga. O le *Tamaoiga ole Lava ma Totoe*, e tuu le faamamafa ile pule faasoa, ae le ole aofai o mea ua maua. A lelei le pule male faasoa, tusa pe laititi, e fiu e lava ma totoe. O vavega e le tupu ina ua tele mea. Ae tupu ina ua lelei le pule faasoa. O aso nei ua tele mea, ae le lava lava le faasoa. Ua faamalosiā ai male “*Aganuu Lafoa'i*” poo le “*Throw away culture*” e pei ona faimai ai Pope Francis? O aso nei ua sili atu lo tatou manao, i mea e maua ole aso. Ua leai se lauvae ma ni tua'oi e faatonutonu ma taofiofi ai le mana'o.
- Lima, e iai si mea manaia lena e maua ile f.ii. “*ua avatu e faitalia i latou*”. Tasi lea mea na ala ai ona tofu le faasoa i lea aso. Ona sa avatu e Iesu areto ma i'a, e faitalia le motu o tagata ona faasoa. Tasi lea vavega ole *Tamaoiga ole Lava ma Totoe*, ole talitonuina o tatou tagata e faia le faasoa. E ese le manaia ose tamaoiga e pule ai lava tatou. E faasoa e tatou. E lē pulea mai e nisi i fafo. E aumai le tupe, ae iai male lauvae. Ma faatonutonu mai ele au maumea le faaogaina. Pau le mea o manaomia, ole faamaoni.

Ole *Tamaoiga ole Lava ma Totoe*, e lē tigaina ai le Fofoaga. O mea ua maua ile foai ale Atua ile aso, e fai ai le faasoa. Tusa pe laititi.

Matega i Fale (Deep Sea Mining)

E le o toe nā male laina, ua iai *matega i Fale*, pei o lea upu. E ala lea ile *Deep Sea Mining* (DSM). Afai o lea ua talanoaina e Amerika ma Tutuila le “*elipuina ole fatu ole moana*” poo le DSM e taua le “*talanoa faafale*”. Aua le vavevave. Sei *fālē* faatasi le mataupu. Aua ole maasiasi le maoaluma.

Ole DSM e le mafai ona ola i lalo ole *Tamaoiga ole Lava ma Totoe*. Leaga ole DSM e fanau mai ile neoliberal capitalist economy, poo le tamaoiga o maketi ma polofiti. Le tamaoiga lea o loo ta'u e le isi toeaina ole matou nuu, ole *tamaoiga lē ma'ona*.

E 31 miliona eka ole ogasami ole a eliina e Amerika e latalata ile itu i Saute o Manu'a. E faitau piliona le tupe e

EKALEsia FAAPOTOPOTOga	KERISIANO AMERIKA SAMOA
maua ai. O ma'ama'a e ta'ua o Polymetallic Nodules e maua pe ā male 6000 mita ile loloto ole sami. O ia ma'ama'a poo minerale na fau ma faaputupu mai le fia miliona tausaga ua mavae. E faaoga ile fausianina o ma'a taavale eletise, aemaise lava o mea faatonutonu alu mamao o aupega o taua. E le tatau ona savea tuvaelua le tulaga o Amerika Samoa i lenei mataupu. E tatau ona mautu lana tali "leai" e afua i mea nei. Ma o recommendations foi nei e tatau ona toe silasila iai Tutuila ma Manu'a. i. Ole Foafoaga, ole Fale e "mau" ai le Atua. E le ose <i>Fale Tu'ufua</i>, ma e le ose <i>Fale Tu'ufau</i> foi. Ole Fale e iai ona sã ma faigã. E iai ona tapuāfanua ma lona tagata'aga. Ole DSM, ole isi laasaga faakolone e ono faaleagaina le Fale ole Atua. ii. Ole eleele male sami, ole tino, toto, male aano ole tagata Samoa. E fesootai ma femalua'i mea nei. Ole faaleagaina ole sami ma eleele, ole faaleagaina foi lea o Samoa ma ona tagata. i) O le taimi nei, e le o lava suesuega ma saililiga e manino mai ai ni afaina pe a faataunuu le DSM. Aua ose taimi muamua lea ole a faatino ai. Ole finau lea ole toatele o atunuu e 40 ole lalolagi, lea e lavea ai ma Samoa. Latou te lagolagoina se faia ose "Moratorium" poo se vaitau e faatalitali ai, sei maea lelei saililiga ale au popoto su'esu'e e faailoa ona afaina. E le tatau ona tatou aami i tiga tatou te le i momoo iai. ii) E le o faamautinoa mai e Amerika ni aiaiga talafeagai e puipuia ai ogasami mai le afaina, atoa ma atunuu ole Pasefika, e pei o Samoa, Tutuila, ma Manu'a. E pei la o nei. Ole eliga, e la'u i luga ole vaa ia ma'ama'a ia e ta'ua o polymetallic nodules. O luga ole vaa e faamama ai, ma tuu eseese ai le minerale ma 'amu, ona toe tia'i lea o 'amu ile sami, ole lapisi lea. Lona uiga, e leai se mea e tia'i ai le lapisi, e toe tia'i lava ile sami. Ma afaina ai meaola uma. iii) E tafe le otaota, ole suauu, ole leaga e totoe mai ile eliga ole sami, e tafe atu i isi ogasami ma motu. Afai e eli le gataifale o Manu'a, e mautinoa e tafe lona afaina i totonu lava o Manu'a ma isi motu uma ole Pasefika. O le a afaina ogasami faasao, o 'amu faasao, o nofoaga o i'a, aemaise ole tele o nofoaga ole sami o loo faamoemoe iai le toatele ole Pasefika. iv) E tatau ona tatou aoga mai ile mea na fai e Ausetalia ia Nauru, ma Peretania ia Banaba (Kiribati), na eli uma o latou laufanua mole phosphate. Na maea loa le lelei sosola loa, ae tia'i ai le faalaulautoafa ua iai nei atunuu. E mautinoa, e malo atunuu maumea ile polofiti ae faalolo atunuu laiti. v) E le o manino mai le tali a Amerika poo a manuia e maua e Amerika Samoa ma ona tagata pe a oo ina faatino le DSM.	<u>Pupū i Fale</u> E le ose mea leaga le pupū i Fale. Ole isi tagata e ala ona pupū i Fale, ona e alofa ma fulufulele ile Fale. Ole pupū i Fale, ole nofo i lalo ma toe silasila ile tatou lava Fale. Poo lelei pe leai. O le toe silasila e faaalu lo tatou malosi ile faaleleia ole Fale. Leaga e leai se isi Fale. E tasi a lo tatou Fale. Ao lea Fale o lea e "mau" ai male Atua. Nei tei ua tatou popole tele ile Fale oi le lagi, ae tia'i le Foafoaga lea foi e "mau" ai le Atua. I le Ioane 6, e amata le tala o lae saili laolao Iesu ise mea e malolo iai, ao lae lava e mulimuli iai tagata ona o faailoga. "<i>Ua maliliu ae Iesu ile mauga, ua nofo i lalo, o ia ma ona so'o</i>" (f.3). Ua tatau ona to'atamai Iesu, ua fia malolo. Ua tuneva le aso. Ae taua le mea lea na fai e Iesu i lea aso. O le "<i>nofo i lalo</i>" na toe maua ai manatu lelei. O le "<i>nofo i lalo</i>" o Iesu, na maua ai le avanoa e fai ai se a'oga mole ausoo i le mataupu lenei. E tali ai le fesili "<i>e auma ea ia mea ia i latou e toatele?</i>" O le vaega lea ile tatou aganuu a Samoa e fanau mai ai le lagimalie. Le tōfā manino. Soo se tōfā manino, e amata ile lelei ole Sāo. Le tōfā taofiofi. E ta'u ele Tusi Paia le mea lea ole "Sapati." E le faatatau ise aso. E faatatau ile alafua ua faataoto ele Atua e maua ai le "lagimalie" faaleAtua mole Foafoaga, e ala i le malōlō ma toe fotua'i. E manaia ae amata le pupū i fale, i le atiae oni polokalame a le Ekalesia e faamalosia ai le puipui ole Fale ole Atua e ala ia tatou Aoga Aso Sa, o Autalavou, o Pesega, ma Lauga. Lona uiga, ua le toe iai se mea foi lea ole faaoga ole "microwave sermon", poo le lauga toe faafaga. E manaomia ele Ekalesia ni lauga fou ma anoa e fulufulele e puipui le Fale ole Atua. E ita pe a faaleaga e nisi le Fale. E taua foi ia ole fatu ose Mataupu Silisili e faailoa ai lona pupū male fulufulele ile puipuga ole Foafoaga. Aemaise se mataupu silisili e taiala ai ana polokalame ma vaega uma ole galuega ale Atua. <i>Manuia tele le Fonotaga!</i> Saunia Upolu Lumā Vaai (PHD) *****

O LEO MAI I LE MOANA

(O se va'aiga fa'atalafa'asolopito i nisi o leo mai i le Pasefika i fa'afitauli e tau i le foafoaga)

Rev. Yonah Muasau

Pepa a le Kolisi Fa'afai'efau i Kanana Fou mo le Fonotele EFKAS 2026

Fa'atomuaga

Ua fa'aulutalaina lenei pepa "O Leo Mai i le Moana". A o tau saili se fa'asoa e fai atu i lenei taeao, sa taumafai lava e fa'afeso'ota'i ma le fa'afitauli lea o lo'o tula'i mai i o tatou motu i le eliina o le ta'ele o le moana po o le sami, fa'apea fo'i ma le autu o lenei Fono Tele. Sa tau ai loa le mafau'fau i se fesili taua. O ai e fai ma leo o le moana?

O lenei fesili e le faigofie. A e maise mo i tatou tagata Pasefika. Auā e tusa ma o tatou tala'aga, o le moana e le o se mea sa tu'ufua ma tu'ufau e o tatou tagata, e lē o se mea e na o le va'aia i le va o motu. O le moana o le ala lea na femalagaa'i ai o tatou tua'ā. O le moana na feso'ota'i ai motu ma tagata o le Pasefika. O le moana fo'i e maua ai mea'ai e tausia ai aiga, ma ua fai lava ma vaega taua o le olaga o tagata Pasefika mo augātupulaga e tele.

A e a o o'u faitau fa'asamasamanoa i nisi o tala'aga mai i le Pasefika, na ou iloa ai ma le mautinoa e lē tutusa le va'ai a tagata Pasefika ma le va'ai a malosi'aga mai fafo i lenei moana. Mo nisi, o le Pasefika ua na o se fa'aputuga o tama'i motu i le moana tele. A o isi, o le Pasefika o lo'o i ai puna o 'oa e mafai ona ave'esea. Mo nisi fo'i, o le Pasefika o se nofoaga e mafai ona faia ai ni fa'ata'ita'iga e lē mafai ona faia i o latou lava laufanua.

Peita'i, e lē tatau ona nonofo filemu le Pasefika e aunoa ma se tali. E i ai leo o Pasefika. O leo a ona tagata. O leo a ona laufanua. O leo a le moana. O leo e manatua lava i le talafa'asolopito. O le autū o lenei Fono Tele, "O le Foafoaga e Fale i ai le Atua," ua vala'auina ai i tatou e lē gata ina ia tatou va'ai i le foafoaga, a e ia tatou fa'alogofa'i i a tatou uso mai i le Pasefika.

O le manatu tāua a Epeli Hau'ofa e mafai ona avea ma amataga lelei o lenei talanoaga. Na ia lu'iina le manatu ma le va'ai maulalo o atunu'u tetele e fa'apea o motu o le Pasefika o ni motu laiti, e fa'amoemoe ma fa'alagolago i isi. Na ia fa'amanatu mai, o i tatou o tagata o le moana o motu (*sea of islands*). O lona uiga, o le moana e le va ma eseese ai i tatou; a o le moana tatou te feso'ota'i ai. Afai tatou te iloa ma talia o le Pasefika o se aiga e feso'ota'i i le moana, ona tatou iloa lea e iai se mea e mafai ona a'oa'oina tatou mai i mea e tutupu i le tasi nu'u mo le puipuiga o le isi.

Nauru ma Kiribati

O se tasi o tala'aga e tatau ona tatou fa'alogofa'i ai, o le tala'aga o le phosphate i Nauru. Na maua le phosphate i Nauru i le tausaga e 1900, ma mulimuli ane avea ai ma vaega tāua o tamaoaiga o fa'ato'aga i fafo atu o le Pasefika. I le 1919, na fa'avaeina ai e Peretania, Ausetalia, ma Niu Sila le British Phosphate Commissioners. O le faiga lea na mafai ai ona avea le phosphate o motu Pasefika ma puna o le tamaoaiga mo isi tamaoaiga i fafo atu o le Pasefika. O le eliina o phosphate na suia ai le laufanua o Nauru ma aumaia ai āuga tumau i le elelee, vai, la'au, ma le mafai ona fa'aaogā le fanua mo le olaga o tagata. E tatau ona sa'o le tala'aga: e lē o Ausetalia na o ia na fausia lenei faiga. O se faiga fa'ava-o-malo na aofia ai Peretania, Ausetalia, ma Niu Sila. Peita'i, sa avea Ausetalia ma se tasi o malosi'aga tāua i totonu o lea faiga ma o se tasi na maua fa'amanuiaga mai le phosphate. O lea la, ua lāgā mai e Nauru se fesili tāua: Pe a ave'esea le 'oa mai le fanua, o ai e tauaveina le tiute mo le fanua ma tagata o loo nonofo ai?

E feso'ota'i le tala'aga o le motu o Banaba i Kiribati ma lenei tala ia Nauru. Ua fa'aalia e Katerina Teaiwa i lana tusitusiga e uiga ia Banaba le tala'aga o pulega fa'akolone, o le tamaoaiga na maua i le phosphate, o le fa'ate'aina o tagata Banaba mai lo latou motu, ma le toe manatunatu o tagata i o latou laufanua ua tu'ulafoa'iina.

Atu Maresala ma Ma'ohi Nui

Mulimuli ane, na avea le Pasefika ma nofoaga autū mo fa'ata'ita'iga fa'aniukilia i le vaitaimi o le Cold War. I le va o le 1946 ma le 1958, na faia ai e le Iunaite Setete ni fa'ata'ita'iga fa'aniukilia e 67 i le Atu Maresala. O le fa'ata'ita'iga o Castle Bravo i le 1954 na avea ma se tasi o fa'ata'ita'iga sili ona malosi na faia e le Iunaite Setete. Na fa'ate'aina tagata mai o latou fanua, na a'afia nofoaga i le radiation, ma na lē toe mafai e nisi o tagatanu'u ona toe fo'i i o latou fanua.

A e o le va o le 1977 ma le 1980, na fausia ai le Runit Dome i le motu o Runit i le Atu Maresala e lafoa'i ai otaota mai i ia fa'ata'ita'iga ua a'afia i le radiation. O loo taofia i totonu o lea Dome le silia ma le 100,000 cubic yards o ia mea. Ma ua amata nei ona liki atu le radiation i le moana. O loo tumau pea lea Dome ma molimau e lē mafai ona galo: ua uma le fa'amoemoe sa mana'o i ai atunu'u tetele, a e tumau lava āuga.

E fa'apenaina fo'i se tala'aga na tupu i atu motu o Ma'ohi Nui. Na amata e Farani ana fa'ata'ita'iga fa'aniukilia i Moruroa ma Fangataufa i le 1966, ma na fa'aaauai ai se'ia o'o i le 1996. E 193 fa'ata'ita'iga na faia i ia motu e lua.

Tuvalu

O le tala'aga mai i Tuvalu ua aumaia ai se isi leo e lata mai. E le po se lilo i le tatou mafutaga ma nai uso Tuvalu, a e maise ai fo'i le fa'afitauli i le si'i o le mauuluga o le moana. Na tuto'atasi Tuvalu i le 1978. I tausaga mulimuli ane, na avea ai suiga o le tau ma se tasi o mataupu sili ona t'aua mo le lumana'i o Tuvalu. E itiiti lava le sao o Tuvalu i le fa'aputupu'utuina o kasa oona ua mafua ai le tele o suiga o le tau i le lalolagi, a e o loo feagai pea ma āuga ogaoga o ia suiga.

O tusitusiga a Maina Vakafua Talia ua fesoasoani e aumaia lenei mataupu i se tulaga e mafai fo'i ona tatou malamalama i ai. O lona fa'aaogāina o le manatu o le *tuākoi*—o le tuaoi, po o le uso i le fa'aSamoa—ua fesiligia ai i tatou i le uiga o le avea ma tuaoi pe a lē tutusa faiga a le lalolagi i tagata uma.

O nei tala'aga uma e lē tutusa. Ae o loo i ai se auala e feso'ota'i ai nei tala'aga: o le fesili po o ai e faia fa'ai'uga, po o ai e maua le fa'amanuiaga, ma po o ai e tauaveina āuga ma fa'afitauli e mulimuli mai?

Fa'ai'uga

O le mea lea ua avea ai le mataupu o le eliina o le ta'ele o le moana ma se mataupu e tataua ona tatou mafaufau loloto i ai i Amerika Samoa. O le aso 16 o le masina nei na fa'alauiloa ai e le Marine Minerals Administration a le Lunaite Setete le avanoa o se Proposed Leasing Notice mo se fuafuaga e faia ai se American Samoa Outer Continental Shelf Mineral Lease Sale i se taimi mulimuli. A e ua leva ona iai leo o le Pasefika i lenei mataupu. Iulai 15, 2025, na tu'uina mai ai e le Pacific Conference of Churches se fa'amatalaga ua fa'aulutalaina, "Pacific Ocean Guardianship Is Not for Sale: Pacific Churches Stand in Solidarity Against Deep Sea Mining in American Samoa." I le avea ai ma leo o ona sui Ekalesia ma Ekalesia i le Pasefika, na fa'ailoa ai e le PCC lona tutu fa'atasi ma le EFKAS, o Ekalesia So'ofa'atasi a Amerika Samoa (NCC), a e maise o le Malo o Amerika Samoa. Na fa'ailoa manino fo'i e le PCC e lē na o se mataupu fa'asaienisi, a e o se mataupu tau i le itu fa'aleagaga, fa'apea ma aia tataua a tagata.

O le mea t'aua i lenei tulaga, ua i ai leo o le aiga lautele o le Pasefika. O le moana, i le malamalamaaga a le PCC, e lē o se mea e na o le ave'esea mai ai o 'oa. O le moana o le ola, o le tofi, o lo'o ta'atia ai tiutetauave o tagata Pasefika. O le mea lea ua lāgā mai ai fesili e tataua i so'o se faiga e ono a'afia ai le moana: O ai e faia le fa'ai'uga? O ai e maua le fa'amanuiaga? O ai e tauaveina le auga ma fa'afitauli? Ma o ai o le a tali pe a iai ni āuga e lē mafai ona toe fa'aleleia?

O iinā tonu e t'aua ai le sao o le Ekalesia. E lē tataua ona tatou manatu o mataupu tau le si'osi'omaga e lē o ni

mataupu fa'afa'alelotu. O tusitusiga a Ama'amalele Tofaeono na aumaia ai se auala e mafaufau ai i le foafoaga e ala i le aiga. O loo aumaia ai se malamalamaaga fa'a mataupu silisili e fa'avae i tu ma aga ma tala a Samoa, lea e mafai ai ona tatou toe mafaufau i le olaga o se lalolagi o faia. O tusitusiga fo'i a Upolu Lumā Vaai ua fa'apea fo'i ona lu'iina ai le manatu e mafai ona tu'u'ese'eseina le fa'atuatua, aganu'u, nu'u, amiotonu, ma le foafoaga. Ua fa'aalia ai o le tagata e le i fafo atu o le foafoaga, a e o loo ola le tagata i totonu o faia ma feso'ota'iga ma isi mea ola. O le mea lea e tataua ai ona manatua e Amerika Samoa lona lava tala'aga.

I le aso 17 o Aperila 1900, na sainia ai e ta'ita'i o Tutuila ma Aunu'u le Deed of Cession. I le aso 14 o Iulai 1904, na sainia ai fo'i e ta'ita'i o Manu'a le Instrument of Cession mo Manu'a. E lē tataua ona tatou toe fa'amatala nei Deeds. Ae e tataua ona tatou manatua le mafua'aga t'aua o lenei faia. O le tala'aga o le cession na fausia ai se faia ma le Lunaite Setete i totonu o se malamalamaaga o le puipuiga, le fa'amaoni, ma le fa'asaoina o aia tataua ma avanoa o tagata Samoa.

O lea la, a tatou fesili i aso nei po o le ā le uiga o le puipuiga, e lē tataua ona tatou manatu i ai na o le puipuiga fa'amiliteli. E tataua fo'i ona tatou fesili: Pe lē aofia ea le puipua o le si'osi'omaga o loo tatou aumau ai? Pe lē aofia ea i le puipuiga o Amerika Samoa le manatu i le soifua manuia o ona tagata ma augātupulaga o le lumana'i?

Afai o le puipuiga o se vaega o le fa'amoemoe na fa'avae ai lenei faia, ona tataua lea ona tatou fesili pe fa'apefea ona malamalama i lea puipuiga i lenei senituri lona luasefulutasi. Auā o le puipua o se nu'u e lē na o le puipua o ona tagata mai i fili; ae aofia ai fo'i le manatu i le soifua manuia o tagata ma le lumana'i o le foafoaga o loo latou nonofo ai.

Ua uma fo'i ona tatou fa'afoga i nisi o molimau mai i isi motu i fa'afitauli sa feagai ma latou. O le mafua'aga lea e t'aua ai le i'ugafono ua saunia e le Laulauafono mo le tu'uina atu i lenei Fono Tele. O lea i'ugafono o se fa'ailoga ua filifili le Ekalesia e lē nofo filemu, pe nofonofa e aunoa ma se leo i lea mataupu e a'afia ai le soifua manuia o tagata ma le tausiga o le foafoaga.

E tataua fo'i ona tatou fa'afetai i le Pacific Conference of Churches mo lona tutu fa'atasi ma Amerika Samoa. Ua fa'amanatu mai e le PCC e lē tataua ona tauaveina e se tasi o le aiga Pasefika na o ia se avega e a'afia ai le moana atoa. Ua fa'ailoa mai fo'i e lenei tulaga, e ui ina eseese motu ma malo, a e e mafai lava ona tasi le leo pe a a'afia le olaga ma le lumana'i o le aiga Pasefika.

O nai motuga'afa ia e tu'uina atu i luma o le Fono Tele tatou te manatunatu ma fetufa'ai ai i lenei taeao.

Manuia le Fono Tele a le Ekalesia!

Saunia Rev Yonah Muasau KFTC

LISI O LE 'AUFAGALUEGA AGAVAA MO LE GALUEGA TAUSI 'AULOTU

O le lisi lenei o le 'Aufaigaluega i Faifeau Samoa (FS) ma A'oa'o Kanana Fou (AKF) o lo o avanoa ma agavaa mo le galuega tausī 'aulotu. Ua saunia lenei lisi ona o le finagalo a le Fono Tele (FT:16-26), e fesoasoani ai i 'aulotu o lo o tau saili ni o latou Faifeau. O suafa ia, e le gata o le 'aufaigaluega o lo o galulue nei mo le Ekalesia Aoao i Kanana Fou ma le Ofisa Tutotonu, a o latou foi o lo o galulue fa'amaoni i tua i 'aulotu ma Pulega e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i lenei lisi, ia fa'afesootai mai le Ofisa a le Failautusi Aoao i le imeli: gensec@efkas.org, e fa'alauiloa ai lou suafa i le taimi e toe lolomi ai le Lamepa.

Ofisa Tutotonu:

Liavaa Moevao FS
Tamilo Palepua FS
Tui Luani FS

Ofisa A'oa'oga Kerisiano:

Setefano P. Lefale FS, *Fa'atonu*
Vili Polikapo FS
Penani Lefaoese FS
Ronald Tuimauga FS
Magaga Talo AKF
Vagana Saili FS
Meke Matautia FS

Ofisa Lamepa:

Soosoo Tuiolomotu FS
Gatai Patu FS

Aoga Mauauga Kanana Fou:

Tupuivao Ioelu FS
Siaosi Suhren FS

Matagaluega Manu'atele:

Ioane Ioane FS (Fitiuta)

Matagaluega Sasa'e:

Waiana Tanielu FS (Masausi)
Tui Luani FS (Masausi)
Magaga Talo AKF (Masefau)
Setefano Lefale FS (Auasi)
Vili Polikapo FS (Amouli)
Edward Semaia FS (Aunuu)
Siavao Iese FS (Alofau)

Matagaluega Tutotonu #1:

Tumau Petaia FS (Fagaalu)
Canton Fano FS (Fagaalu)
Poutoa Leituala FS (Pago Pago)
Tamilo Palepua FS (Pago Pago)

Matagaluega Tutotonu #2:

Isaako Matautia Jr FS (Fagasa)
Vagana Saili FS (Matuu&Faganeanea)
Meke Matautia (Nuuuli)
Tupuivao Ioelu FS (Petesa Tai)
Siaosi Suhren FS (Ierusalem Fou)
Gatai Patu FS (Petesa Uta)
Ekueta Tyrell AKF (Petesa Tai)

Matagaluega Sisifo:

Sinaka Ulutu FS (Malaaloa)
Penani Lefaoese FS (Faleniu)
Veteran Brown AKF (Iliili)
Ronald Tuimauga FS (Aolou)
Sitau Ofoia Jr FS (Vaitogi)
Soosoo Tuiolomotu FS (Poloa)

Matagaluega Kalefonia i Matu:

Moegagogo Tamasese FS
Eliu Eseroma FS (Daly City)
Ketese mane Tagaloa FS (Sacramento)
Peter Fualaau FS (Sacramento)
Euta Asifoia AKF (Oakland)

Matagaluega Kalefonia i Saute:

Sugalu Filivaa AKF (Ola Fou LB1)
Malaki Tauiliili FS (Ola Fou LB1)
Malaga Tapafua AKF (Ola Fou LB1)
Niu Sapolu AKF (SCCC)
Mose Mose FS (USC)

Matagaluega Amerika:

Folauga Tupuola FS (Etena Fou)
Saumaleato Fuimaono FS (Etena Fou)
Tata Falaile AKF (Vaomoana)

Matagaluega Alaska:

Poasa Maui FS (Faavae Fou)
Troy Foilefutu FS (Feagaiga Fou)
Tomasi Foilefutu AKF (Feagaiga Fou)

Matagaluega Niu Sila & Ausetalia:

Tautalaaso Asiata FS (Ranui)
Iulio Pati AKF (Wiri)

LISI O 'AULOTU AVANO

O nisi ia o 'aulotu o le EFKAS ua avanoa i le taimi na lolomi ai lenei Lamepa, o le a aoga ai lenei lisi e saili ai so latou faifeau:

EFKAS Faleasao
EFKAS Iliili
EFKAS Amanave
EFKAS Fagasa
EFKAS Masausi

IA SILAFIA: O 'ATA UMA O LE LAMEPA, E MAFAI ONA E MAIMOIA AI I LUGA O LE UPEGA TAFAILAGI, I LE TUATUSI:

<https://www.facebook.com/LamepaEFKAS/photos>

TAUTUA PRINTSHOP

EKALESIA FAAPOTOPOTOGA KERISIANO I AMERIKA SAMOA

1 Kanana Fou, Pusa Meli 1537, Pago Pago, Amerika Samoa 96799

Telefoni: +(684) 699-9810 / Tuatusi Upega Tafailagi: <https://efkas.org>